

Ski alpin: success per Fadri Janutin

Sen la dretga veia



Fadri Janutin scu precurriered tigl slalom dalla coppa mundiala ad Adelboden.

Gion Nutegn Stgier / FMR

Ainten la sia anc giovna carriera ò Fadri Janutin gudagnea per l'amprema geda ena cursa dalla coppa d'Europa. Graztga alla ferma prestaziun aint igl sagond percurs ò igl Surmrian gudagnea igl slalom an Frantscha. Gio en de avant igl sies success ò igl skiunz da 22 onns persvadia sen camp internaziunal.

Scu commember digl cader da skis da juniors digl Grischun (BSV), dalla Svizra orientala (NOZ) ed er cura tg'el ò anc appartignia agl team grischun dad JO ò Fadri Janutin gudagnea ple u manc tot chegl tg'è sto pussebel. Chegl vot deir tg'el è davanto ples gedas campium grischun, ò gudagnea igl classamaint general dalla Coppa Raiffeisen ed er la rangaziun finala dallas cursas interregionalas dalla regiun Svizra orientala. Igl mat, tg'è uriund da Marmorera e sesent a Landquart totga tar egn digls gronds talents da skis. El è cunzont er en sportist tg'ò la perseveranza, la pazienzta ed igl potenzial da far carriera, schinavant tg'el resta schurmagea

da blessuras. Da preschaint è Fadri Janutin commember digl cader B da Swiss Ski. El è er sto ples gedas campium svizzer digls juniors e chegl aint igl slalom, la sia disciplina pi ferma. Medaglias ò el alloura er fatg tigl campiumadis svizzers digls juniors aint igl slalom gigant.

Viccampium mundial tigl juniors

Fadri Janutin è bagn sen la dretga veia an direzziun cursas dalla coppa mundiala, pero chella veia è fitg pretensiosa e dovra er blera passium, perseveranza, voluntad e cletg. Per ansomma sa participar a chellas cursas ò el da far tantas cursas da FIS scu pusseblas per redutgier igls sies puncts da FIS. Pi pacs puncts da FIS tg'en skiunz ò e migler tg'el è. La madema veia scu chegl tgi Fadri Janutin ò da far igl mument, chella ò per exaimpel fatg er Sandro Simonet da Casti, tg'è commember digl cader nazional da Swiss Ski. Da neir schinavant è gio tot oter tgi simpel cun esser fitg gronda la concorrenza. An chel senn maretta mintga skiunz tgi totga tar en cader da Swiss Ski respect ed anc duple sch'el dastga far cursas dalla coppa mundiala e dalla coppa d'Europa. Sen camp internaziunal ò Fadri Janutin gia igl anvien 2021 igl pi grond



Igl skiunz surmrian è commember digl cader B da Swiss Ski. Fotos Swiss Ski

success. A Bansko, an Bulgaria, è el nia vice-campium mundial tigl juniors aint igl slalom e turno a tgesa cun la medaglia d'argent.

Scu precurriered ad Adelboden

Igl bungs resultats dallas davosas emdas conferman tgi Fadri Janutin è da preschaint an furma e tg'el totga tar egn digls ferms dalla sagonda garnitura digls spezialists da slalom dalla Svizra. Avant igl sies success a Vaujany an Frantscha cun la victorgia aint igl sagond slalom dalla coppa europeana ò el gio persvadia tigl dus slaloms a Berchtesgaden an Germania. Tigl ampem slalom ò Fadri Janutin gia aint igl sagond percurs schizont igl migler taimp a Berchtesgaden. A Vaujany tigl sies success è el sto siva igl ampem percurs anc 7avel. Aint igl sagond percurs ò igl skiunz da 22 onns testifitgia la sia classa e gudagnea alla fegn la cursa cun en avantatg da quatter tschentavels segl Franzos Paco Rassat. Igl de avant ò igl spezialist da slalom obtignia plaz tschintg cun mantgantar igl plaz da podest per 40 tschentavels. En punct culminont per Fadri Janutin è sto tigl slalom dalla coppa mundiala ad Adelboden, noua tg'el è sto egn digls precurriers ed ò dastgea galdeir l'ambianza geniala.